

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KETIGA,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB DATUK WIRA HAJI AHMAD BIN HAMZAH
[JASIN]**

TARIKH : 20 OKTOBER 2015 (SELASA)

SOALAN :

Datuk Wira Haji Ahmad Bin Hamzah [Jasin] minta PERDANA MENTERI menyatakan nilai GNI per kapita kaum Bumiputera, Cina dan India pada tahun 2009, 2014 dan unjuran pada tahun 2020 nanti serta usaha-usaha konkret untuk merapatkan jurang tersebut.

JAWAPAN: YB SENATOR DATO' SRI ABDUL WAHID B. OMAR,
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, perkiraan GNI per kapita adalah berdasarkan GNI dibahagi dengan jumlah penduduk. GNI per kapita mengikut kaum tidak boleh dikira kerana pengiraan GNI bukan berdasarkan kaum. Sekiranya pendapatan hendak dilihat berdasarkan kaum, adalah lebih sesuai untuk menggunakan pendapatan bulanan purata isi rumah. Bagi mengukur jurang pendapatan dalam kalangan rakyat, tiga indikator diguna pakai iaitu pekali Gini, nisbah ketidaksamaan pendapatan dan agihan pendapatan antara kumpulan pendapatan isi rumah.

Pekali Gini digunakan untuk mengukur ketidakseimbangan pendapatan dalam kawasan atau etnik yang sama, misalnya di antara isi rumah berpendapatan terendah dan isi rumah berpendapatan tertinggi di kalangan etnik Bumiputera. Bagi melihat jurang di antara dua kawasan atau etnik yang berbeza, ukuran nisbah ketidaksamaan pendapatan lebih sesuai digunakan. Indikator agihan pendapatan pula mengukur peratus agihan pendapatan negara antara kumpulan pendapatan isi rumah seperti kumpulan isi rumah berpendapatan 40 peratus terendah (B40), 40 peratus pertengahan (M40) dan 20 peratus tertinggi (T20). Sehubungan itu, ukuran nisbah ketidaksamaan pendapatan adalah lebih sesuai digunakan.

Nisbah ketidaksamaan pendapatan berdasarkan etnik bagi tahun 2012 dan 2014 adalah seperti berikut:

Etnik	Pendapatan rasa di dalam isi rumah B40 (%)	
	2012	2014
Bumiputera: Cina	1:1.38	1:1.38
Bumiputera: India	1:1.10	1:1.13
India: Cina	1:1.25	1:1.23

Rancangan Malaysia Kesebelas (RMKe-11) mengambil kira konsep inklusif di mana unjuran adalah di peringkat nasional. Bagi tujuan tersebut, pekali Gini diunjurkan berkurangan daripada 0.401 pada tahun 2014 kepada 0.385 pada tahun 2020.

Bagi memastikan jurang pendapatan rakyat ditangani secara berterusan, Kerajaan akan meneruskan prinsip dan pendekatan pembangunan secara inklusif sepertimana yang akan dilaksanakan dalam Rancangan Malaysia Kesebelas (RMKe-11). Tumpuan akan terus diberikan untuk meningkatkan penyertaan isi rumah B40 tanpa mengira gender, etnik, status sosioekonomi dan kedudukan geografi dalam aktiviti ekonomi. Inisiatif utama termasuk:

- Pertama: **Meningkatkan pendapatan dan kekayaan isi rumah B40** dengan membesar saiz masyarakat kelas menengah; mengurangkan kadar kecinciran pelajar dalam kalangan isi rumah B40; memastikan akses kepada pendidikan dan latihan kemahiran tinggi; meningkatkan produktiviti dengan menggalakkan penggunaan teknologi moden; meningkatkan penggunaan teknologi maklumat dan komunikasi; meningkatkan sokongan keusahawanan secara bersepadu; membangunkan perusahaan

berasaskan komuniti dan sosial; menggalakkan pelaburan di kawasan majoriti isi rumah B40; dan memperluas program pelaburan bagi meningkatkan pemilikan kekayaan; dan

- Kedua: **Menangani kos sara hidup yang meningkat** dengan memperkuuh pemantauan dan penguatkuasaan peraturan berkaitan kawalan harga; meningkatkan penyediaan rumah mampu milik; meningkatkan perkhidmatan penjagaan kesihatan; memperkenalkan sistem jaringan perlindungan sosial yang bersepadu dan komprehensif; dan meningkatkan program pengurusan kewangan dan hutang.

Sekian. Terima kasih.